



5. marts 2010

FM 2010/48

Inatsisartut Suleriaasianni § 36, imm. 2 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

**Anguteqatiminnik arnaqatiminillu atoqateqartartut inatsisitigut periarfissaasa
suaassuseqatiminnik atoqateqartanngitsutulli ilersinnissaat qulakkeerniarlugu
Naalakkersuisut suliniutit suut aallartinniarpaat?**

(Inatsisartunut ilaasorta q Justus Hansen, Demokraatit)

Tunngavilersuut

Demokraatit illersugaraat, kikkut tamarmik assigiimmik pineqarnissaat, suaassutip qanoq ittuunera, sumiuuneq, upperisaq imaluunniit atoqateqartarneq apeqquatainnagu. Inoqatitta ilarpassui – quliungaangatta ataaseq – anguteqatiminnik arnaqatiminilluunniit atoqateqartartuupput, ullumikkullu taakku inuiaqatigiinni allatulli inatsisitigut illersorneqanngillat. Tamanna akuerineqarsinnaanngilaq taamaattumillu Demokraatit isumaat naapertorlugu allanngortittariaqarpoq, anguteqatiminnik arnaqatiminillu atoqateqartartut allatulli pisinnaatitaaffealersillugit.

Tamanna anguneqassappat iliuusissat arlaqarput. Ilaquttat, inuiaqatigiillu akuerisariaqarpaat ataqqillugulu atoqateqartarnermi toqqakkap suunera qitiusumiillu suliniutigineqartariaqarpoq, Kalaallit Nunaanni akorngusersuutaasut paquminartunngortitsisarnerillu piiarneqarnissaat.

Demokraatit inuit qanoq ikkaluartulluunniit inooqatigiinnissaat pingaartippaat upperalugulu, assigiinngitsuuneq aqqutigalugu assigiimmik atungaqalernissaq anguneqarsinnaasoq. Allatut oqaatigalugu kikkut tamarmik inissaqartariaqarput, assigiinngitsut amerlaneruppata periarfissat amerlanerulissapput.

Inuiaqatigiittut angusinnaasariaqarparput, immikkoortitsisoqannginnissaa. Taamali pisoqassappat, tamanna Naligiisitaanermut Ataatsimiititaliamut suliakkiissutigisariaqarpoq taamaattumik siunissami immikkoortitsisarnerit assersuutigalugu anguteqatinik arnaqatinillu atoqateqartarneq pissutigalugu Naligiisitaanermut Ataatsimiititaliap aamma suliarisalertariaqarpaat. Kalaallit Nunaanni Naligiisitaanermut Ataatsimiititaliap suliarisassaa allanngortittariaqassagunarpoq, tamannali aporfiusariaqanngilaq.

Demokraatit isumaat naapertorlugu siunissami naligiisitaaneq angutinut arnanullu taamaallaat tunngasariaqanngilaq – aammali arnanik angutinillu atoqateqartartunut kiisalu anguteqatiminnik arnaqatiminillu atoqateqartartunut aamma tunngasariaqarpoq.

Naalakkersuisut akissutissaat qilanaarlunga utaqqivara.